



Majlis Ugama Islam Singapura

Khutbah Jumaat

5 Ogos 2016 / 2 Zulkaedah 1437H

“Rahmat Allah Meliputi Segala Makhluk”

الْحَمْدُ لِلَّهِ الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ بَشِيرًا وَنَذِيرًا
وَدَاعِيًا إِلَى اللَّهِ بِإِذْنِهِ وَسِرَاجًا مُنِيرًا وَأَشْهَدُ أَنْ لَا إِلَهَ إِلَّا اللَّهُ
وَحْدَهُ لَا شَرِيكَ لَهُ وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ
وَصَفِيُّ اللَّهِ مِنْ خَلْقِهِ وَحَبِيبُهُ إِمَامُ الْأَنْبِيَاءِ وَسَيِّدُ الْمُرْسَلِينَ اللَّهُمَّ
صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلِّمْ تَسْلِيمًا كَثِيرًا.
أَمَّا بَعْدُ فَيَا عِبَادَ اللَّهِ اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ
مُسْلِمُونَ

Sidang Jumaat yang dirahmati Allah,

Bertakwalah kepada Allah s.w.t. dengan sebenar-benarnya.

Lakukan segala yang diperintahkan-Nya dan tinggalkan segala tegahan-Nya, semoga kita memperoleh petunjuk dan bimbingan yang berterusan daripada-Nya. Amin.

Saudaraku,

Jika kita amati setiap surah di dalam Al-Quran, kita akan dapati bahawa setiap surah dimulakan dengan perkataan *Bismillahir*

Rahmanir Rahim atau dikenali sebagai Basmalah, kecuali pada surah At-Taubah. Ia membawa maksud: *“Dengan nama Allah yang Maha Pengasih lagi Maha Penyayang”*

Dari sekian banyak sifat atau nama Allah, namun yang terpilih dalam Basmalah adalah Ar-Rahman dan Ar-Rahim. Apakah rahsianya saudara? Dan apakah yang dimaksudkan dengan Ar-Rahman dan Ar-Rahim?

Mengikut sebahagian ahli tafsir, Ar-Rahman dan Ar-Rahim dipilih bagi menjelaskan sifat Allah di dalam Basmalah kerana sifat ini adalah sifat yang paling dominan. Kedua-duanya terambil dari akar kata yang sama iaitu Rahmah. Ar-Rahman menggambarkan curahan rahmat Allah kepada sekalian makhluk-Nya, sedangkan Ar-Rahim menjelaskan bahawa Allah memiliki sifat rahmat yang khusus menghiasi dzat-Nya.

Sidang Jumaat yang dirahmati Allah!

Rahmah Allah mempunyai pelbagai makna. Ia mencakupi makna perhatian Allah, hidayah dan petunjuk-Nya, ketetapan seseorang hamba dalam kebenaran, pahala dan syurga. Ini semua sudah tentu mendorong seseorang hamba untuk bersyukur kepada Allah di atas kurniaan dan rahmat-Nya. Dengan rahmat Allah yang Maha luas, hamba-hamba-Nya yang tidak beriman sekalipun akan memperolehi nikmat-Nya. Rasulullah s.a.w memberikan gambaran betapa agungnya

rahmah Allah dengan sabdanya yang bermaksud: *“Allah Azza wa Jalla menjadikan rahmat seratus bahagian. Dia menyimpan di sisi-Nya sembilan puluh sembilan bahagian dan diturunkannya ke bumi ini satu bahagian. Satu bahagian inilah yang dibagi kepada seluruh makhluk sehingga seekor binatang akan mengangkat kakinya kerana dorongan kasih sayang, khawatir jangan sampai kakinya menginjak anaknya.”* [Hadith riwayat Imam Muslim]

Para jemaah yang dirahmati Allah,

Antara rahmah dan kasih sayang Allah kepada kita, adalah pengurniaan segala nikmat kehidupan ini, tanpa meminta balasan walau dengan satu sen sekalipun. Bayangkanlah saudara, jika sekiranya kita ditimpa sakit atau dimasukkan ke hospital, berapa banyak belanja yang bakal kita keluarkan? Lanjutan dari persoalan di atas, tidakkah kita berfikir sejenak, selama ini Allah memberi kepada kita kesihatan tubuh badan, sedangkan Allah tidak pernah meminta kita membayar harga nikmat kesihatan yang diberikan? Seandainya kita diminta untuk membayarnya, sudah pasti kita tidak mampu untuk melakukannya!

Rahmah Allah s.w.t. kepada hamba-hamba-Nya, tidak terhitung banyaknya. Sebagaimana difirmankan dalam surah Al-A'raf ayat 156:

❁ وَأَكْتُبْ لَنَا فِي هَذِهِ الدُّنْيَا حَسَنَةً وَفِي الْآخِرَةِ إِنَّا هُدْنَا
 إِلَيْكَ قَالَ عَذَابِي أُصِيبُ بِهِ مَنْ أَشَاءُ وَرَحْمَتِي وَسِعَتْ كُلَّ
 شَيْءٍ فَسَأَكْتُبُهَا لِلَّذِينَ يَتَّقُونَ وَيُؤْتُونَ الزَّكَاةَ وَالَّذِينَ هُمْ
 بِآيَاتِنَا يُؤْمِنُونَ ﴿١٥٦﴾

Maksudnya: “Dan tetapkanlah untuk kami kebajikan di dunia ini dan di akhirat; sesungguhnya kami kembali (bertaubat) kepada Engkau. Allah berfirman: "Azab-Ku akan Kutimpakan kepada siapa yang Aku kehendaki dan rahmat-Ku meliputi segala sesuatu. Maka akan Aku tetapkan rahmat-Ku untuk orang-orang yang bertakwa, yang menunaikan zakat dan orang-orang yang beriman kepada ayat-ayat Kami.”

Ayat yang baru dibacakan tadi, menjelaskan penetapan Allah bagi orang-orang yang berhak mendapat rahmat-Nya. Mereka secara khusus adalah; orang-orang yang bertakwa, orang-orang yang menunaikan zakat dan orang-orang yang beriman dengan tanda-tanda kebesaran-Nya.

Dan diantara ciri yang ketara pada diri orang-orang yang bertakwa adalah, mereka akan membawa tiga tanggungjawab bersama mereka di mana jua mereka berada. Bermula dengan ciri menjaga amanah agama, menyebarkan nilai dan prinsip Islam yang universal dan sentiasa berinteraksi sesama manusia dengan akhlak yang baik.

Ini dapat diambil dari pesan Baginda di dalam hadith yang diriwayatkan oleh Abu Dzar dan Muadz bin Jabal, Rasulullah Saw bersabda:

اتق الله حيثما كنت، وأتبع السيئة الحسنة تمحها،
وخالق الناس بخلق حسن

Maksudnya: *“Bertakwalah kamu kepada Allah di mana jua kamu berada, dan iringilah kejahatan dengan kebaikan, nescaya ia akan menghapuskan kejahatan tersebut dan bergaullah sesama manusia dengan budi pekerti yang baik.”*

[Hadith riwayat Imam Ar-Tarmidzi]

Saudaraku,

Di ambang menyambut Hari Kebangsaan yang ke 51, kita bersyukur kepada Allah s.w.t. di atas segala nikmat yang Allah kurniakan. Alhamdulillah, negara kita terselamat dijauhi daripada segala kekecohan dan perbalahan. Sebagai tanda kesyukuranlah maka kita perlu terus berusaha sedaya upaya untuk mengekalkan keamanan ini serta menolak sebarang pendapat ekstrim dan tegar yang tidak selari dengan kehidupan bermasyarakat di negara majmuk Singapura.

Dalam suasana hidup di negara Singapura yang aman dan makmur, sebagai masyarakat Islam, pesan Nabi s.a.w. tadi seharusnya menjadi darah daging yang sehati di dalam diri kita secara rohani dan jasmani. Dengan panduan sunnah Nabi

s.a.w. tadi serta kesyukuran kita atas segala nikmat kurniaan Allah ini, kita sebagai seorang warga Negara Muslim, akan sentiasa bersedia memberi sumbangan ke arah kemajuan dan kemakmuran negara. Seorang Muslim yang baik memahami bahawa tidak ada konflik di antara menjadi Muslim yang baik dengan menjadi rakyat yang baik. Jatidiri seorang Muslim bukan hanya terletak pada hukum-hukum Syara' yang lahiriah atau hak-hak peribadi semata. Malah jatidiri Muslim juga boleh menyerlah dengan menjadi rakyat yang baik yang mendokong prinsip dan nilai manusiawi yang universal.

Semoga Allah sentiasa mencurahkan rahmat dan kasih sayangnya kepada hamba-hamba-Nya yang cinta membuat kebaikan dan kebajikan serta menghindarkan segala bentuk permusuhan dan persengketaan di antara umat manusia. Amin.

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ
الْعَلِيمُ، أَقُولُ قَوْلِي هَذَا وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا
فَوْزَ الْمُسْتَغْفِرِينَ وَيَا نَجَاةَ التَّائِبِينَ.